

Kila mtu asiangalie mambo yake mwenyewe, bali kila mtu aangalie mambo ya wengine.—
Wafilipi 2:4.

Wito wa [Paulo] ulikuwa wa dhati na wa kugusa jinsi gani: “Maana mmejua neema ya Bwana wetu Yesu Kristo, jinsi alivyokuwa maskini kwa ajili yenu, ingawa alikuwa tajiri, ili kwamba ninyi mpate kuwa matajiri kwa umaskini wake.” Unajua upeo wa jinsi Alivyojishusha, kina cha fedheha Aliyoishukia. Miguu Yake iliingia katika njia ya kafara na bila kugeuka upande mpaka Alipoyatoa maisha Yake. Hakukuwa na kupumzika Kwake kati ya kiti cha enzi mbinguni na msalaba. Upendo Wake kwa mwanadamu ulimfanya kukaribisha kila ufidhuli na matusi.

Paulo anatuonya “Kila mtu asiangalie mambo yake mwenyewe, bali kila mtu aangalie mambo ya wengine.” Anatutaka tuwe na nia “ambayo ilikuwamo pia ndani ya Kristo Yesu; ambaye yeye mwanzo alikuwa yuna namna ya Mungu, naye hakuona kule kuwa sawa na Mungu kuwa ni kitu cha kushikamana nacho; bali alijifanya kuwa hana utukufu, akatwaa namna ya mtumwa, akawa ana mfano wa wanadamu; tena, alipoonekana ana umbo kama mwanadamu, alijinyenyekeza akawa mtii hata mauti, naam, mauti ya msalaba.”

Petro anasema, “Nanyi mfahamu kwamba mlikombolewa si kwa vitu viharibikavyo, kwa fedha au dhahabu” ... (1 Petro 1:18). Kama kweli haya yangetosha kununua wokovu wa mwanadamu, ingekuwa rahisi jinsi gani kutimizwa na Yeye asemaye, “Fedha ni mali yangu, na dhahabu ni mali yangu”! (Hagai 2:8). Lakini mwenye dhambi angeweza tu kuokolewa kwa damu ya thamani ya Mwana wa Mungu. Wale ambao wanashindwa kuthamini kafara hii ya pekee, wanakataa wenyewe huduma ya Yesu na watapotea katika ubinafsi wao....

Kila mtu anayempokea Yesu kuwa Bwana na Mwokozi wake binafsi ataionea shauku kila fursa ya kumtumikia Mungu. Akitafakari juu ya kile ambacho mbingu imemfanyia, moyo wake unasukumwa na upendo usio na mipaka na kuabudu kwa shukrani. Anajawa na shauku ya kuonesha shukrani yake kwa kuvitoa wakfu vipawa vyake kwa kazi ya Mungu. Anatamani sana kuonesha upendo wa Yesu na kwa mali Yake aliyoinunua. Anatamani taabu, shida na dhabihu.

Mtenda kazi wa kweli wa Mungu atafanya kila awezalo, kwa sababu kwa kufanya hivyo anaweza kumletea utukufu Bwana Wake. Atafanya yaliyo sawa ili kuheshimu matakwa ya Mungu. Atajitahidi kuboresha uwezo wake wote. Atafanya kila wajibu kama kwa Mwenyezi Mungu. Shauku yake kuu itakuwa kwamba Kristo apokee heshima na huduma kamilifu.

Kuna picha inayomwakilisha fahali mdogo akisimama kati ya jembe na madhabahu, yenye maandishi “Tayari kwa lo lote—tayari kufanya kazi mtaroni au kutolewa kwenye madhabahu ya dhabihu ya kafara. Hii ni hali ya kila mwana wa Mungu wa kweli—huwa tayari kwenda kokote anapoitwa, kujikana nafsi, kujitoka kafara kwa ajili ya kazi ya Mkombozi (**The Ministry of Healing, 501, 502**).